

AKASHVANI AIZAWL

REGIONAL NEWS BULLETIN

HEADLINES (EVENING)

- 1. Larsap General (Retd) Vijay Kumar Singh an langin vawiin khan Serchhip District a tlawh.

- 2. India ram zalenna champha vawi 79-na lawmna kal zelah hnam puanzar chawimawina leh mipui hnena thlen beihpui, Har Ghar Tiranga neih mek a ni.

- 3. Prime Minister Narendra Modia chuan vawiin khan MP te chenna tur Type-VII inchhawng 184 chu Baba Kharak Singh Marg, New Delhi-ah a hawn.

- 4. Parliament chuan Manipur Budget (2025-26) a pawm.

<><><>

GOVERNOR

Larsap General (Retd) Vijay Kumar Singh an langin vawiin khan Serchhip District a tlawh a,

Serchhip Bawrhsap Pisapui Hall ah District a sawrkar Department hotute leh Serchhip a NGO hruihlo te hmaah thusawiin District a kut hnathawh tu ten ei leh bar a an lo intodelh theih na tura Sawrkar laipui atanga Scheme hrang hrang lokal thin te chu hlawk taka a tam thei ang ber lo chhawr tangkai turte, Mizoram State chu India ram state dangte tluk hauhlo tura leilung hanna chauh hmanga thlai thar ngei champion pui tur leh abikin, State sawrkar ruahmanna hnuaiah Sawhthing hrisel tha leh fresh tha a tam thei ang ber tharchhuak a, chung chu dahthat theih tura siam leh thin ni se a ti.

(BYTE)

Larsap chuan District chhunga Sawrkar laipui School te chu tangkai zawk a lo chhawr zel turte, Mizo thalai te chu anmahni leh an chhungkaw tana tha em em pakhat, a tam thei ang Sipai a lut tura a fuih bakah Mizoram chu ruihhlo kalkawng pakhat anih thu leh ruihhlo hian thalai te ah chauh nilo, State hmalam hun zel tana thil pawl tak a thlen chhoh dawn avangin Ruihhlo tawlhute man kawngah thuneitute theihtawp chhuah alo tanpui thin turin mipuite a sawm bawh.

Governor hi All NGO Co-ordination Committee hruihlo nen inkawm chhonzawmin, All NGO Co-ordination hruihlo chuan Home Ministry atanga India

leh Myanmar inkar hung tumna (FMR-Border Fencing) chu tha an tihpui thu leh chaktaka kalpui turte, District chhunga NHIDCL ten kawngpui siam mekah, hmanrua tha leh tlo zawk an hman ngei theih nan a hmalakpui zel turte, Serchhip District chhunga Myanmar leh Bangladesh raltlan te dinhmun diktak tihchian anih theih nan leh Chhiahtlang daia Industrial Training Institute(ITI) building sak zawh fel vek tawh chu a tak hman thuai anih theih nan a hmalak pui turin an ngen a ni.

Larsap hian Serchhip a 14th Assam Rifles hmunpui a tlawh hnuah, Kum 2011 a lung a lo phum tawh New Serchhip a ‘Shalom Special School’ chu tlawhin, rualbanlo zirlai leh zirtirtute bakah School Management Committee ten lo dawngsawng in, an School mamawh chi hrang hrangte an lo thlen bawk a ni. Larsap hian chawhnu lam khan Chhingchhip a ‘Sainik School’ a tlawh bawk.

<><><>

CM

Chief Minister Pu Lalduhoman a office-ah UD & PA officialte kawmin, Thenzawl Peace City Master Plan siamtu tur zawinna kalpui meka an thlen chinte a sawipui a. Chief Minister hi Pu Vanlaldina Fanai, Secretary to CM in a tawiawm a ni.

UD & PA Secy Pu Lalmalsawma Pachuau chuan, thla hlui July ni 22 khan Master Plan siamtu tur zawinna hmahruai Request for Proposal for selection of Consultant an tihchhuah thu leh company lian tak tak sawm leh pariatten an rawn ngaihven thu a tarlang a. Heng Pre Bid Queries rawn nei zingah hian khawvel huapa company thate pawh an tel thu a tarlang.

Ruahman anga thil a kal chuan tun September thla tir hian a thawktu tur thlanna hi neih fel hman tum a ni a, October thla atangin hna an tan ang a, tun sorkar kum chhungin Master Plan pawimawh zual chu peih fel hman an tum ang.

Sorkar chuan mipui nuai 10 vel chen theihna tur khawpui changkang - Thenzawl Peace City din tumin hma a la mek a. Ministry of Housing & Urban Affaira (MoHUA) chuan Master Plan siamna tur cheng vbc 10 a pe tawh a ni.

<><><>

HAR GHAR TIRANGA

India ram zalenna champha vawi 79-na lawmna kal zelah vawiin khan hnam puanzar chawimawina leh mipui hnena thlen beihpui, Har Ghar Tiranga pualin Champhai DC Office chuan bike rally a buatsaih a, Champhai Bawrhsap Pu Mohammad Aaquib chuan a vailiam.

He hunah hian Buffalo Riders, 04 Riders leh 04 Girls te sawm bik an ni a, pisa hrang hranga thawk te an tel bawk a ni. Bike leh scooty-ah hian national flag tar a ni a, New Champhai atangin Kahrawt Volleyball Court thleng an khalh a ni.

Kolasib DC Office tual zawlah Kolasib Har Ghar Tiranga Campaign hi neih a ni bawk a. Hemi pual hian kawngzawh ‘Tiranga Yatra’, mimal in tina India hnam puan zar tura au hla ‘Har ghar tiranga’ leh thutiam sawi rualna hun hman a ni.

Mizoram Ex-Servicemen League Sub-Hqrs. Kolasib President, Pu Lalengliana kaihhruaiin Har Ghar Tiranga thutiam leh aurualna neih a ni a. He

hunah hian Sawrkar Official-te, Sainik Mizoram Ex-Servicemen League Sub-Hqrs. Kolasib Member-te leh Kolasib khaw chhunga High School thlan bikte an tel a ni.

Har Ghar Tiranga pual hian naktukah Aizawl Vanapa Hall-ah Tiranga Mela leh Tiranga concert neih a ni dawn a, hetah hian exhibition, handicrafts, handloom leh food court te hawn a ni dawn a ni.

Akashvani Aizawl zawhna chhangin, Art & Culture Department Joint Director, Pu F. Lalthanmawia chuan Ministry of Culture hmalakna a nih angin, Art & Culture Department chu nodal department an ni a ti a, tun dinhmunah Aizawl tih loh Mizorama district hrang hrangah te DC kaihhruaina hnuaiah exhibiton leh thil dang dang ti turin hma an la mek a ti a, Aizawl district-ah pawh hmun 25-ah exhibiton neih tur zinga hmun 24 an nei fel tawh tih sawiin, school leh zirna in hrang hrang baka bazar hmunah te an nei tawh a ti.



NATIONAL DEWORMING DAY

Rulhut hlo pek beihpui thlakna ni, National Deworming Day chu vawiin khan Mizoram district hrang hrangah hman a ni.

Kan corr report lo ngaithla ang.

VC

National Deworming Day hi Sorkar laipui hnuaia Ministry of Health and Family Welfare hmalakna niin Ministry of Women and Child Development leh the Ministry of Human Resource Development nen thawk hovin naupang kum 1 atanga tleirawl kum 19 inkar ten rulhut an pai lohna tur leh rulhut pai avanga nghawng tha lote inzirtirna atan ram pumah kum tin February ni 10 leh August ni 10-ah te hman thin a ni a. Kumin chhunga a vawi hnih nan vawiin khan Mizorama district hrang hrangahte National Deworming Day hi hman a ni a, zirlai naupangte chu rulhut chungchang hriattur hrang hrang zirtir an nih bakah rulhut damdawi Albendazole 400 mg pek an ni bawk.

National Deworming Day (NDD) 2025 thawkhhatna hi kumin February ni 10 atanga ni 17 khan neih a ni tawh a, a thawhnhnihna hi vawiin, August ni 11 atanga ni 18 thleng neih leh tur a ni a. Hemi hun chhung hian District chhunga zirna in hrang hrangah rulhut hlo (Albendazole) a huhovin ei a ni dawn a, tumah hmaih an awm loh nan a thualnawna (Mop Up Day) August ni 18-ah neih leh tur a ni.



NDMA VISIT

National Disaster Management Authority (NDMA) hotute chu Mizoram-a khuarel chhiatna thleng thin leh Mizoramin chhiatna a hmachhawn dan chungchangte belchiang tur leh a tul anga hmalak dan turte rel turin Mizoram-ah an lokal a,

Vawiin khan Aizawl leh Lengpui inkar (Pukpui) kawnga lung tlak thinna hmun an tlawh nghal a; Pukpuiah hian kumin April ni 28 khan lung tla-in Pu Lalrinliana, Falkland-te chhungkaw chuanna Motor delhin, amah bakah a nupui leh an fanu ten nunna an lo chan phah tawh a ni.

Ruahman dan chuan NDMA hotute hian naktukah District thuneitute leh mi pawimawh dangte an kawm dawn a, State Emergency Operations Centre, Aizawl an tlawh nghal ang. Naktip khian Champhai District leh Khawzawl District-a khuarel chhiatna thlen nasat zualna hmunte tlawh lehin District Emergency Operations Centre-te an tlawh nghal bawk dawn a ni.

<><><>

AIR NEWS ON SOCIAL MEDIA

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni.

Naktuk zing dar 7 leh a chanve-ah Chanchinthar puan leh a ni ang.

<><><>

PM

Prime Minister Narendra Modia chuan vawiin khan MP te chenna tur Type-VII inchhawng 184 chu Baba Kharak Singh Marg, New Delhi-ah a hawn. Thusawiin PM Modia chuan kum zabi 21-naa India ram chuan hmasawinna a lungkham ber tih swiin mawhphurna pawh a la nasa a ti a. Kum 2014 atang khan MP te chenna tur hi in 350 vel sak a ni tawh tih a sawi a ni. Vawiina hawn tak insak tharte hi chhawng khat square feet sang nga theuha zau a ni a. Tunlai bungrua leh changkang ber bera thuam niin MP te tana chenna in mai bakah official hna thawhna tur hmun zau tak ruahman a ni.

<><><>

MANIPUR BUDGET

Parliament chuan Manipur Budget (2025-26) a pawm. Hei bakah hian Manipur Goods and Services Tax (Amendment) Bill, 2025 leh The Manipur Appropriation (No.2) Bill,2025 a pawm bawk a. Lok Sabha-ah pawm anih hnuin vawiin khan Rajya Sabha-ah sawiho a pawm a ni a. Union Finance Minister Nirmala Sitharaman-i chuan sawihonaah budget puitling anih avangin Manipur tan thil khirhkhan tak a ni a, hei vang hian ram danpui hnuaiah member tinten he budget atan hian mawh an phur tih a sawi a ni.

<><><>